

Il vegl casti

Ti vesas leu sil tgiembel
Il vegl casti s' alzar;
Tgei praulas, tgei historias
Sa quel aunc relatar!

En quel pli baul vivevan
Garmadis castellans,
Ferm dominond la tiara
Cun sbiers e cun trabants.

Els mavan alla catscha
Tras pradas e tras grauns,
prendevan raub' e veta
Als paupers concarstgauns.

El ferm casti allura
Sedivertevan tuts,
Fagevan biala stiva,
Baraccas e slamuzs.

Cun mescal, cun pignola
Uss ein ils mirs surtratgs,
Caladas ein las fiastas
De castellans sfarfatgs.

E cloma leu la tschuetta
Da notg cun tun profund:
„Mirei, aschia passa
La gloria da quest mund!“

Alfons Tuor (1871-1904)

